



ORDENANZA Nº 5  
**TAXA POLA OCUPACIÓN DO SOLO,  
SUBSOLO E VOO DA VÍA PÚBLICA.**

Artigo 1º.- Fundamento e natureza.

Ó amparo do previsto nos artigos 58 e 20.3 apartado e), g), j), k) da Lei 39/1988, do 28 de decembro, reguladora das facendas locais, de conformidade co que dispón os artigos 15 ó 19 do dito texto legal, este Concello establece a taxa polas ocupacións do subsolo, solo e voo da vía pública, que se rexerá pola presente ordenanza fiscal.

Artigo 2º.- Feito impositivo.

Constitúe o feito impositivo da taxa a utilización privativa ou o aproveitamento especial do subsolo, solo e voo da vía pública, nos termos establecidos no artigo 6 desta ordenanza, onde se regulan as tarifas para aplicar.

Artigo 3º.- Suxeito pasivo.

Son suxeitos pasivos das taxas, en concepto de contribuíntes, as persoas físicas e xurídicas, así como as entidades ás que se refire o artigo 33 da Lei xeral tributaria, a favor das cales se outorguen as licencias para gozar do aproveitamento especial, ou quen se beneficie deste, sen ter solicitado licenza.

Artigo 4º.- Responsables.

1.- Responderán solidariamente das obrigas tributarias do suxeito pasivo tódalas persoas que sexan causantes ou colaboren na realización dunha infracción tributaria.

2.- Os copropietarios ou cotitulares das entidades xurídicas ou económicas a que se refire o artigo 33 da Lei xeral tributaria responderán solidariamente en proporción ás súas respectivas participacións das obrigas tributarias das ditas entidades.

3.- Os administradores de persoas xurídicas que non realicen os actos da súa incumbencia para o cumprimento das obrigas tributarias daquelas responderán subsidiariamente das débedas seguintes:

a) Cando se cometeu unha infracción tributaria simple, do importe da sanción.

b) Cando se cometeu unha infracción tributaria grave, da totalidade da débeda esixible.

c) En supostos de cesamento das actividades da sociedade, do importe das

obrigas tributarias pendentes na data de cesamento.

4. A responsabilidade esixirase en todo caso nos termos e consonte ó procedemento previstos na Lei xeral tributaria.

Artigo 5.- Beneficios fiscais.

1.- O Estado, as comunidades autónomas e as entidades locais non estarán obrigadas ó pagamento da taxa cando solicitasen licenza para gozar dos aproveitamentos especiais, necesarios para os servizos públicos de comunicacións que exploten directamente e para outros usos que inmediatamente interesen á seguridade cidadá ou á defensa nacional.

2.- Non se aplicarán bonificacións nin reducións para a determinación da débeda.

Artigo 6º.- Cota tributaria.

As empresas explotadoras de servizos de subministracións que afecten á xeneralidade ou a unha parte importante da veciñanza, a contía da taxa regulada nesta ordenanza consistirá, en todo caso e sen excepción ningunha, no 1,5 por cento dos ingresos brutos procedentes da facturación que obteñan anualmente neste termo municipal as ditas empresas.

As taxas reguladas nesta ordenanza esixibles ás empresas explotadoras de servizos de subministracións citadas son compatibles co imposto sobre construcións, obras e instalacións e con outras taxas que teñan establecidas ou poida establecerse-lo Concello, pola prestación de servizos ou realización de actividades de competencia local, das que as mencionadas empresas deban ser suxeitos pasivos.

Cando para a autorización da utilización privativa se utilicen procedementos de licitación pública, o importe da taxa virá determinado polo valor económico da proposición sobre a que recaia a concesión, autorización ou adxudicación.

Artigo 7.- Normas de xestión.

1.- Para os efectos da aplicación das tarifas establecidas no punto 3 do artigo anterior, as vías públicas municipais clasifícanse en 1ª categoría.

2.- Cando o espazo afectado polo aproveitamento estea situado na confluencia de dúas ou máis vías públicas clasificadas en distinta categoría, aplicarase a tarifa que corresponda á vía de categoría inferior.

3.- Poderanse establecer convenios de colaboración con organizacións representativas dos suxeitos pasivos, ou con entidades que deban tributar por municipalidade de feitos impositivos, co fin de simplificar os procedementos de declaración, liquidación ou recadación.

4.- A taxa prevista no punto 2 do artigo anterior deberá ser satisfeita polas empresas prestadoras de servizos de subministracións que afecten á xeneralidade da veciñanza tanto canto sexan propietarias da rede que materialmente ocupa o subsolo, solo ou voo das vías públicas municipais, como no suposto

que utilicen redes que pertencen a un ceiro.

5.- "Telefónica de España, SA" presentará as súas declaracións axustadas que prevé a vixente Lei 15/1987, declaración de ingresos brutos comprada a facturación de "Telefónica de España, SA" e das súas empresas filiais.

Artigo 8º.- Obriga de contribuír.

1.- A taxa aplicarase cando se iniciase o uso privativo ou o aproveitamento especial, momento que, a estes efectos, enténdese que coincide co de concesión de licenza, se esta foi solicitada.

2.- Sen prexuízo do previsto no punto anterior será preciso deposita-lo importe da taxa cando se presente a solicitude de autorización para gozar especialmente do dominio local en beneficio particular.

3.- Cando se produciu o uso privativo ou aproveitamento especial sen solicitar licenza, a aplicación da taxa ten lugar no momento do inicio do dito aproveitamento.

Artigo 9º.- Período impositivo.

1.- Cando a utilización privativa ou aproveitamento especial deba durar menos dun ano, o período impositivo coincidirá con aquel determinado na licenza municipal.

2.- Cando a utilización privativa ou aproveitamento especial se estenda varios exercicios, a aplicación da taxa terá lugar o 1 de xaneiro de cada ano e o período impositivo comprenderá o ano natural, salvo nos supostos de inicio de cesamento na utilización privativa ou aproveitamento especial, en que se aplicará o previsto nos apartados seguintes.

3.- Cando se inicie a ocupación no primeiro semestre aboarse en concepto de taxa correspondente a ese exercicio a cota íntegra. Se o inicio da ocupación tiver lugar no segundo semestre do exercicio liquidarase a metade da cota anual.

4.- Se se cesa na ocupación durante o primeiro semestre do exercicio procederá a devolución parcial da cota (a metade). Se o cesamento ten lugar no segundo semestre, non procederá a devolución de ningunha cantidade.

5.- Cando non se autorice a utilización privativa ou o aproveitamento especial ou este non resultase posible por causa non imputables ó suxeito pasivo, procederá a devolución do importe satisfeito.

Artigo 10º.- Réxime de declaración de ingreso.

1.- A taxa poderase esixir en réxime de autoliquidación.

2.- Cando se suscribisen convenios con representantes dos interesados, segundo o previsto no artigo 7º.4 desta ordenanza, as declaracións de inicio do aproveitamento especial ou das variacións dos elementos tributarios, así como o ingreso da taxa, realizaranse segundo convenio.

3.- En supostos diferentes do previsto no apartado 2, as cantidades esixibles consonte ás tarifas liquidaranse por cada aproveitamento solicitado ou realizado e

serán irreductibles polos períodos de tempo sinalados nos respectivos epígrafes.

4.- En supostos de concesións de novos aproveitamentos a obriga de pagamento nace no momento de solicitar a correspondiente licenza. A estes efectos, xunto coa solicitude de autorización para gozar do aproveitamento especial, presentarase debidamente cuberto o imposto de autoliquidación da taxa.

Alternativamente poden presentarse na Secretaría os elementos da declaración co obxecto de que o funcionario municipal competente preste a asistencia necesaria para determinala débeda. Neste suposto expedirase unha obriga de pagamento ó interesado, co obxecto de que poida satisfacer a cota naquel momento ou no prazo de dez días, nos lugares de pagamento indicados na propia obriga de pagamento.

5.- Nos supostos de aproveitamentos xa autorizados e prorrogados o pagamento da taxa efectuarase no primeiro trimestre de cada ano. Co fin de facilitar o pagamento o Concello remitirá ó domicilio do suxeito pasivo un documento apto para permitilo pagamento en entidade bancaria colaboradora.

Non obstante a non recepción do documento de pagamento citado non invalida a obriga de satisfacer a taxa no período determinado polo Concello.

6.- O suxeito pasivo poderá solicitar a domiciliación do pagamento da taxa, en tal caso ordenarase o cargo en conta bancaria durante a última quincena do período de pagamento voluntario.

Artigo 11º.- Notificacións das taxas.

1.- A notificación da débeda tributaria en supostos de aproveitamentos singulares realizaráselle ó interesado, no momento en que se presenta a autoliquidación, con carácter previo á prestación do servizo.

Non obstante o previsto no apartado anterior, se unha vez verificada a autoliquidación resultase incorrecta, practícase liquidación complementaria.

2.- Nos supostos de taxas por aproveitamentos especiais continuados que teñen carácter periódico, notificarase persoalmente ó solicitante a alta no rexistro de contribuíntes. A taxa de exercicios sucesivos notificarase colectivamente, mediante a exposición pública do padrón no taboleiro de anuncios do Concello, polo período que se publicará no BOP.

3.- Ó abeiro do previsto na disposición transitoria segunda da Lei 25/1998, as taxas de carácter periódico reguladas nesta ordenanza que son consecuencia da transformación dos anteriores prezos públicos non están suxeitas ó requisito de notificación individual, sempre que o suxeito pasivo da taxa coincida co obrigado ó pagamento do prezo público ó que substitúe.

Artigo 12º.- Infraccións e sancións.

As infraccións e sancións en materia tributaria rexeranse polo disposto na Lei xeral tributaria, a súa normativa de desenvolvemento e na Ordenanza xeral de xestión, inspección e recadación aprobada polo Concello na sesión do .....

Disposición final.

A presente ordenanza, aprobada provisionalmente polo Pleno da Corporación na sesión do 20 de novembro de 1998, e que quedou definitivamente aprobada, entrará en vigor o mesmo día no que se produza a súa publicación íntegra no BOP e comezará a aplicarse a partir do día 1 de xaneiro de 1999, permanecendo en vigor ata a súa modificación ou derogación expresa.

O ALCALDE.- A SECRETARIA.